

EDITORIAL

Nauneg a krisis ken nainget a dangadang daytoy napalabas a tawen

Ad-adda a kimmaro daytoy napalabas a tawen 2025 ti krisis iti ekonomiya ken pulitika ti agar-ari a sistema, ad-adda a kimmaro ti pannakibiang militar ti imperyalismo a US ken dimmakes ti kasasaad panggimong ti mayorya ti umili. Kagiddan daytoy, imminget dagiti dangadang laban iti korapsyon ken pasismo ti rehimen US-Marcos.

Kimmaro ti panagririkyar dagiti agar-ari a dasig, partikular ti rinnupak ti agkaribal a bunggoy ti Marcos ken Duterte. Inpila ti Konggreso idi Pebrero ti *impeachment* laban ken Sara Duterte, ngem naitantan ti kaso idi lapdan mismo ni Ferdinand Marcos Jr ti panagdengngeg iti Se-

nado. Idi Marso, nakitinnulong ni Marcos iti Interpol iti panagaresto ken panangibalud iti sigud a presidente a ni Rodrigo Duterte idiy The Netherlands iti bileg ti mandamyento ti International Criminal Court. Idiyay a masapit isuna kadagiti krimen iti sangkatawan-an gapu iti nasaknap a

pammapatay iti "war on drugs."

Naangay idi Mayo ti eleksyon iti senado, konggreso ken lokal a guberno. Garapal ti sinasaur ken manipulasyon ti resulta. Inpakita daytoy ti risiris ken akomodasyon ti nadumaduma a bunggoy ti agar-ari a dasig, ken pannakibiang ti imperyalismo a US. Bayat nga agtaltalinaed a sibubukel ti suporta ti US ken Marcos, ipupwesto met daytoyen dagiti reserba a kabalyo na para iti panagtaray inton 2028.

Awan kapada ti pannakibiang militar ti US iti intero a tawen. Iti pannakikumplot iti rehimen Marcos ken panangusar iti Armed Forces of the Philippines (AFP), linuktan da dagiti baro a base ken pasilidad militar. Nagideposito ti US kadagiti nayon nga armas panggubat iti Pilipinas. Awan ressat a naiyaramid dagiti managprobokar nga ehersisyo militar iti uneg ken aglawlaw ti South China Sea, a pakadangran dagiti mangngalap a Pilipino.

Ad-adda nga imminget ti rinnupak dagiti agar-ari a dasig kalpasan a maibulgar dagiti dadakkel a kaso ti korapsyon kanaig dagiti naanomalya a flood control project ken kontrata kadagiti proyekto a pang-imprastruktura. Bimtak ti pungtot ti umili iti ginabsuon a kwarta nga ibulbursa ni Marcos ken dagiti korap nga upisyal ti guberno.

Nagdalluyon iti intero a pagilyan ti nalawa a tignay protesta laban iti korapsyon ken burukrata kapitalismo. Iti unos ti dua a bulan manipud Setyembre, tuluy-tuloy dagiti *walk-out* ken rali dagiti estudyante iti nadumaduma a kampus. Nabukel ti na-



lalapad nga alyansa dagiti pwersa a kontra-korapsyon iti nadumaduma a sektor ken lugar, uray pay adda ti sumagmamano a pwersa a mangiyad-adayo iti pungtot ti umili ken Marcos.

Iti tengnga ti gandat a kaluban ti papel ti Malacañang kadagiti anomalya babaen ti pabuya nga "imbestigasyon," inbunannag dagiti karaman iti korapsyon a mismo a ni Marcos ti utek ken nagawat ti kadakkelan a kikkab iti ginasut a bilyon a piso a proyekto a pang-imprastruktura. Saan a nagbayag, immaweng ti pukkaw para iti panagibbat wenno panagpadisi ken Marcos ken Duterte.

Ti tignay laban iti korapsyon ket bintak iti tengnga ti agtultuloy a panaguneg ti krisis iti ekonomya, panagsuwek ti kasasaad ti nalawa a masa ti umili, ken agsusbangir a programa ken addang ti rehimen Marcos a parigat iti umili.

Nasaknap ti disgusto ti umili ti sango ti nababa a sweldo ti mangmangged, kinaawan trabaho, gistay linawas a pananggato ti presyo ng langis, nangato a singir iti palpak a serbisyo iti danum, kuryente ken transportasyon, *jeepney phaseout*, pribatisasyon dagiti palengke, managdadael iti kalikasan ken pagbiagan a reklamasyon iti baybay, pa-

nagkamkam iti daga, panagpadisi kadagiti mannalon ken dadduma pay a parigat. Ubbaw ti makunkuna a talinaay iti tengnga ti nakaro a panagipawil ken panagparigat iti umili.

Nasaknap ti awag para iti ₱1,200 nga inaldaw a minimum a sweldo. Limmatak ti mano a welga dagiti mangmangged ken tignay ti nadumaduma a sektor iti nadumaduma a lugar tapno ilaban ti pagimbagan da. Lumawlaw a ken umad-adu ti tumaktakder laban iti pasista a represyon ti rehimen Marcos. Adu ti nariing iti panagiparang dagiti progresibo a partido iti nailyan demokratiko a programa iti pannakipaset da iti eleksyon. Ti panagpinget iti panagorganisa ken panagpatignay iti masa ket sigurado nga agurnong ken agbwelo kadagiti sumaruno a panawen.

Iti sango ti nauneg a krisis ken nainget a dangadang, ken bunga ti tignay panagilinteg, tuluy-tuloy a makapappapigsa ti Partido ken dagiti rebolusyonaryo a pwersa. Tuluy-tuloy a maingatngato ti tukad ti teorya ken praktika babaen ti tignay pangadal. Pinasaknap ti Partido ti pangadal iti burukrata kapitalismo kas tarabay iti panagawat ti umili iti limmatak a pakaseknan ti korapsyon.

Mapappapigsa dagiti limed a rebolusyonaryo nga organisasyon ti

masa a mangmangged, mannalon, kabataan, manursuro, artista, siyentista, duktor, nars ken mangmangged iti salun-at, tao't simbaan, dagiti migrante a Pilipino ken dadduma pay a sektor. Bayat nga agpropaganda para iti demokratiko a rebolusyon ti umili, umad-adu ti agdesdesisyon a makipaset iti armado a dangadang ken rebolusyonaryo a tignay ti mannalon iti kaawayan.

Iti kaawayan, tuloy-tuloy nga umab-abante dagiti dangadang ti mannalon iti panagsalaknib iti daga ken pagbiagan da laban kadagiti managkamkam, laban kadagiti parigat a patakaran ti rehimen Marcos ken pasista a represyon dagiti armado a gamat daytoy. Nalatak dagiti barikada ken dadduma a langa ti tignay iti mano a lugar. Mapappapigsa dagiti sangay ken komite ti Partido, mabukbukel dagiti rebolusyonaryo a timpuyog masa dagiti mannalon, kabataan ken babbai, dagiti yunit milisya ken yunit pangdepensa-iti-bagi, bayat nga agpingpinget dagiti yunit ti New People's Army iti gawaing masa ken pannakigubat a gerilya.

Iti panangidaulo ken kabinandang ti Partido, agtultuloy ti NPA iti panagpalawa ken panagpauneg ti base a masa ti mannalon. Awit da ti nalawa a suporta daytoy, kaadwan a yunit ti NPA ket nakapagpreserba ti pigsa iti panagsango kadagiti awanressat nga operasyon kombatan ti AFP. Umad-adu dagiti balligi iti aktibo a panagdepensa, taktikal nga opensiba ken panagdusa kadagiti napeklan a traydor ken pasista. Tuluy-tuloy ti panagrekut ken panagsanay dagiti Nalabbaga a mannakigubat ken kumander.

Iti sango ti kumarkaro a krisis ti agar-ari a sistema, ken iti pundasyon ti tignay panagilinteg, naktannawag ti Partido iti ad-adda pay a panagpappigsa ken panagabante ti demokratiko a rebolusyon ti umili kadagiti umay a tawen. Determinado ti Partido nga idauluan ti nalawa a masa iti panangiyabante ti gubat ti umili ken pananggun-od kadagiti balligi iti intero a pagilian.

 Tawen LVI No. 24 Disyembre 21, 2025	
Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tayo.	
Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan  ang.bayan@cpp.ph	
Linaon Editorial: Nauneg a krisis ken nainget a dangadang daytoy napalabas a tawen Dagiti aksyon ti NPA idia Negros ken Samar Ceasefire iti Paskwa ken Baro a Tawen ti CPP Tuluy-tuloy a konsolidasyon idia Negros Dangadang ti mangmangged Karit ti CNL para iti hustisya Kunsabos ti burgesya kumprador ken burukrata Iti ababa a sarita Dangadang para iti karbengan-tao 3-tawen ti ipupusay ni Ka Joma, linagip MSP-NCR, nagisayangkat asemblya Dagiti mannalon ken katutubo, mapatpatalaw Aldaw dagiti migrante a mangmangged Brutalidad ti militar ken pulis Innareglo ti pondo a "pork" iti badyet 2026 Dangran ken riribuk ti gera nga imperyalista Saan a maatiw ti rebolusyon idia India	

Dagiti aksyon ti NPA idia y Negros ken Samar

Limang nga armado nga aksyon ti insayangkat dagiti yunit ti New People's Army (NPA) iti isla ti Negros ken Samar kadagiti napalabas a lawas. Kabilang kadagitoy ti panagtarget kadagiti aset paniktik ti militar ken dagiti agop-operasyon a pulis.

Idia y Negros Occidental, napatay ni Police Senior Master Sergeant Rommel Aguilar idi nakipinnutok dagiti pulis iti maysa a tim ti NPA-Northern Negros (Roselyn Jean Pelle Command). Nasamsam kenkwana ti maysa a 9mm pistola ken balbala. Nasabat ti NPA ti grupo dagiti pulis iti Purok 5, Barangay Lagaan idia y Calatrava idi Disyembre 7. Paatras idi dagiti Nalabbaga a mannakigubat manipud iti aksyon militar laban ken Mando Ugdiman, maysa nga aset paniktik ti militar, idia y Sityo Tagda, Barangay Dolis. Nasamsam ken Ugdiman ti maysa a .45 pistola, balbala ken dadduma pay nga usar panggubat.

Idi Disyembre 13, natay ti aset paniktik a ni Amay Jimenez idia y Sityo Makilo, Barangay Camansi, Kabankalan City iti operasyon ti

NPA-Southwest Negros (Armando Sumayang Jr Command). Ni Jimenez ket sangkot iti panangitudo iti lokasyon ken panagplano iti panangpatay iti kabsat na a lider mannalon a ni Joseph Jimenez ken iti konsultant pangkapy ti National Democratic Front of the Philippines a ni Ericson Acosta idi Nobyembre 2022. Maysa pay nga aset paniktik ti nadusa idia y Sipalay City idi Disyembre 4.

Nalaing a depensa

Idia y Samar, dua a soldado ti Intelligence Service of the AFP (ISAFP) ken Military Intelligence Battalion (MIB) iti sidong ti 8th ID ti napatay iti armado nga engkwentro iti NPA-Western Samar (Arnulfo Ortiz Command) iti Barangay Babaclayon, San Jose de Buan. Napasamak ti labanan alas-1:32 ti parbangon idi

Disyembre 3.

Segun iti ulat ti NPA, dua a mannakigubat daytoy ti adda iti komunidad tapno konsultaen ti masa a dangdangran ti militarisasyon dagiti soldado. Saan a bumaba iti 20 tropa a militar ti tallo aldawen nga agop-operasyon iti nasao a komunidad idia y nga aldaw.

Ti balay a nagdagusanda ket pinalikmutan dagiti operatiba a paniktik ti militar ken paspasukuen da isuda. Iti sango daytoy, sinigurado dagiti Nalabbaga a mannakigubat ti kinatalged dagiti sibilyan, ken pinarwar da iti balay ti pamilya. Pinaputokan ti maysa a Nalabbaga a mannakigubat dagiti soldado a nakakigtotan da. Iti mismo a sango dagiti kabusor ket nagpakleb ti Nalabbaga a mannakigubat bayat nga agpappaputok ti awit na a pistola. Dua a pasista a tropa ti napatay iti sangon-sango a labanan. Tapno makaadayo, limmagto ti dua a Nalabbaga a mannakigubat paruar ti balay bayat a pappaputokan ti kabusor. AB

Ceasefire iti Paskwa ken Baro Tawen, indeklara ti CPP

Nagdeklara ti uppat nga aldaw a *ceasefire* ti Communist Party of the Philippines (CPP) kas pannakikaykaysa kadagiti tradisyunal a panagrambak ti masa a Pilipino. Inatasan ti Komite Sentral ti Partido ti New People's Army (NPA) nga ipatungpal daytoy manipud 00:00 ti bigat ti Disyembre 25 agingga 23:59 ti rabii ti Disyembre 26 ken manipud 00:00 ti bigat ti Disyembre 31 agingga 23:59 ti rabii ti Enero 1, 2026.

Segun iti liderato ti Partido, ti *ceasefire* ket panangted-dalan kadagiti simple a panagrambak dagiti Pilipino iti sango ti nakaro a kasasaad iti gimong ken ekonomya iti sidong ti rehimen Marcos. Gundaway met daytoy ti rebolusyonaryo a tignay, kadwa ti umili tapno rambakan ti maika-57 anibersaryo ti Partido inton Disyembre 26.

Iti panangipatungpal ti *ceasefire*, inatasan ti Komite Sentral dagiti yunit ti NPA nga ag-aktibo a depensa nangruna iti sango ti awan-sarday

nga operasyon kombatan ti Armed Forces of the Philippines (AFP). Rumbeng kano a nairut a makitinunlong dagiti yunit ti NPA iti masa tapno ipatungpal daytoy. "Rumbeng met a kanayon da a nakasagana nga agmaniobra wenno agisayangkat ti kontra-atake iti panawen a kasapul-an ti kasasaad," segun iti Komite Sentral.

Dagus a kinontra ti AFP ken Department of National Defense ti bangbangir a *ceasefire* ti Partido ken hukbo ti umili. Segun iti Partido,

daytoy a pablaak dagiti tauhan ti rehimen Marcos ket mangipanpaneknek iti uwaw-ti-dara a galad ti armado a pwersa na ken balak na a riribukon dagiti natalinaay a panagrambak ti masa a Pilipino.

"Awan sabali a kayat nga iregallo ni Marcos iti umili kadagiti umay a tradisyunal a panagrambak nu saan a bala ken bomba iti panangmandar na iti AFP ken kadagiti pulis nga agisayangkat ti awan sarday nga operasyon kombatan iti kaaw-awayan," segun ken Marco Valbuena, upisyal iti impormasyon ti Partido.

Kabayatanna, binatikos ti Partido ti inpasaknap ti Philippine Army a panaglalsing ti NPA iti *ceasefire* iti labanan a napasamak idia y Northern Samar idi Disyembre 15, idinto a saan pay daytoy a saklaw ti deklarasyon. AB

Tignay Panagilinteg: Tuluy-tuloy a konsolidasyon ti Partido ken NPA idia'y Negros

Iti tengnga ti nasedsed nga operasyon militar, agpingpinget ti rebolusyonaryo a tignay idia'y Negros iti panangiyabante iti tignay panagilinteg. Tuluy-tuloy daytoy nga agpingpinget a konsolidaen ti New People's Army ken ti Partido. Agisaysayangkat daytoy kadagiti kolektibo a panagadal ti tukad-tukad a kurso ti Partido ken dagiti panagsanay-militar.

Itay nabiit, naangay iti isla ti intermedya a kurso ti Partido iti "staggered" wenno paset-paset a pamuspusan. Dinar-ayan daytoy dagiti kadre ken upisyal militar. Natalged a naileppas ti sibubukel a kurso a bimmayag iti 54 oras. Linaon ti panagadal dagiti nayon a prinsipyo a tarabay iti panangparegta ti gawaing masa ken panangipatungpal kadagiti rebolusyonaryo a trabaho iti balangkas ti tignay panagilinteg.

Naballigi met ti panagleppas dagiti kadre ken upisyal ti NPA iti panagadal ken panagsanay iti pinaababa a kurso iti trabaho a paniktik. Tallo ket gudwa nga aldaw karaman ti praktikum ti kabayag ti panagsanay. Ti resulta ti praktikum ket napagdesisyonan ti kumand nga aramiden nga upisyal a plano kadagiti isayangkat a taktikal nga opensiba ti NPA.

"Nayon a kaamwan daytoy a teoretikal a panagadal ken panagsanay iti naballigi a trabaho a militar nangruna ti panagiruswat ti taktikal nga opensiba," segun ken Ka Marco, lider ti platoon.

"Rumbeng a maikkan hustisya dagiti biktima a kakadwa ken masa manipud iti nakaro a pasismo ti kabusor...kasapulan a makasamsam ti bala ken armas nga agtaud iti berdugo ken pasista nga AFP, PNP ken paramilitar ken ipaarmas kadagiti baro a rekrut a Nalabbaga a mannakigubat," kunana.

"Naluom la unay tatta ti kasasaad iti pulitika. Kasapulan nga akemen ti Partido ti papel na iti panangidaulo ken aramiden ti Hukbo ti sentral a rebbengen daytoy babaen kadagiti naballigi a taktikal nga opensiba kagiddan ti nakaro a pungtot ti umili a Pilipino seknan ti panagtakaw ti estado iti kaban ti umili," segun ken Ka Myra, instruktur iti pulitika.

"Nasken a napigsa a batingtingen ti kampana ti rebolusyonaryo a tignay iti nasaknap nga opensiba ken naaweng a putok dagiti armas ti New People's Army iti kaaw-awayan kagiddan ti nasaknap a protesta ti masa kadagiti kalsada iti kasayudadan," kunana.



CBA ti Wyeth-Nestle ken unyon. Pormal a naiserra ti Wyeth Philippines Progressive Workers Union ti CBA daytoy iti Wyeth-Nestle Philippines idi Disyembre 9. Balligi a nairupir ti unyon ti nayon a sweldo a ₱6,000 iti sumaruno a tawen. Nagun-od met ti unyon ti ₱30,000 *signing bonus* ken dagiti benepisyo a nailaban da iti sangsangkamaysa a tignay.

Protesta dagiti mangmangged ti Gardenia ken Philfoods. Nagtignay dagiti mangmangged ken unyon ti Gardenia Bakeries Phils Inc ken Philfoods Fresh Baked Products Inc iti pabrika ken iti ruar ti Laguna International Industrial Park (LIIP) idia'y Biñan, Laguna idi Disyembre 19. Immawag da ti nayon a sweldo, benepisyo ken panagsardeng iti panagatake kadagiti kameng ti unyon.

DFA ken dagiti *manning agency*, *siningir* dagiti marino a dineport ti US. Kalpasan a nakapadas ti arbitraryo a deportasyon ti US, inpetteng dagiti marino a Pilipino ti karbengan da, ken siningir da ti DFA ken dagiti *manning agency*. Iti dayalogo idi Disyembre 12, nagkari ti upisyal ti DFA a papardasen ti panagiproseso ti baro a pasaporte dagiti apektado a marino, tulong tapno umapela iti panangkanselar ti visa ken ikkaten dagiti babayadan kanaig ditoy.

Panangrespetar kadagiti karbengan iti tegged, nairupir iti Wipro Cebu. Nagisayangkat ti naulimek a protesta dagiti empleyado ti Wipro Philippines idia'y Cebu kagiddan ti pannakidayalogo dagiti mangibagi kadakwada iti kumpanya ken DOLE idi Disyembre 1. Inreklamo dagiti empleyado ti agtutuoan a panaglabsing ti kumpanya iti karbengan da iti tegged. Kangrunaan nga arungaing da ti saan nga naikalintegan a plano ti Wipro Cebu nga ipasidong ti 400 empleyado iti "floating status" manipud idi Disyembre 15.

Dagiti Pilipino a mangmangged idia'y Taiwan, nagbotos tapno agwelga. Nagbotos idi Disyembre 1 tapno agwelga ti babbai a Pilipino iti Taidoc Technology Co. Ltd. Laban iti panaglabsing ti kumpanya kadagiti linteg iti tegged. Kabilang kadagiti panaglabsing ti inkapilitan a panagpadalus iti pabrika, nairut a patakaran iti dormitoryo ken saan a naikalintegan a babayadan. Daytoy ti kaunaan a welga ti unyon.

Panagpanday ti konsensya a panggimong ken panagkaykaysa para iti hustisya ken kinapudno

Limmatak daytoy napalabas a bulan ti nalawa a partisipasyon dagiti tao't simbaan, lider-relihiyoso ken layko kadagiti demonstrasyon laban iti nakaro a korapsyon ti rehimen Marcos. Uray agtaltalinaed a konserbatibo ti Simbaan, ti timek ken takder daytoy ti maysa a napigsa a nakaawis iti rinibo a maki-paset iti tignay ti umili kontra-korapsyon.

Iti tengnga daytoy ti rebolusyonaryo a pannakidangadang dagiti kameng ti Christians for National Liberation (CNL) a bugas ti dangadang ti umili dagiti Kristyano. Kabilang daytoy kadagiti inbinglay da Ka Lila ken Ka Mingol, agpada a baro a nabotosan nga upisyal ti CNL, iti pannakiuman ti Ang Bayan.

Dakkel ti impluwensya ti Simbaan ken dadduma pay a relihiyoso a grupo iti maysa a pagilyan kas ti Pilipinas a mayoria ket Katoliko, panangibingay ni Ka Mingol.

"Maibilbilang da a tagapagsarita ti hustisya ken kinapudno," kunana. Nakaguyugoy kadagiti pamilya ken komunidad ti pannakipaset ti simbaan ken relihiyoso kadagiti tignay protesta gapu ta isuda ket pagrukodan ti kinausto, iti mata ti adu.

Segun met ken Ka Lila, maisursuro kadagiti tao't simbaan ken relihiyoso ti panangisakit iti pada a tao, ti kinasinsero iti panagtulong iti tunggal maysa tapno agtignay para iti kinapudno nangruna iti sango ti nakaro a kinarigat ken didigra. "Saan a maaklon ti sistematiko a panagtakaw ti rekursu a rumbeng a maipapaay kadagiti kangrunaan a pagkasapulan," kunana.

Ngem idi Nobyembre 30, limmatak ti agduduma a takder ti Simbaan iti panawagan ti umili. Nakita daytoy iti nagbalin a garaw ti Iglesia ni Cristo ken dagiti lider ti Catholic Bishop's Conference of the Philippines. Kadagidiay a gundaway, immawag ti CNL a tumakder nga awan kompromi-

so ken agtignay basar iti hustisya ken rumuk-at manipud iti binnusor dagiti agar-ari a dasig ken dagiti pamilya nga agnumnumar iti burukrata-kapitalismo.

"Ti isyu ti korapsyon iti *flood-control projects* ket maysa a bassit a paset laeng ti nasaknap ken sistematiko a korapsyon ti reaksyunaryo a gubyrno," segun ken Ka Lila. Saan laeng a seknan daytoy iti susik ti sumagmamano nu di ket seknan iti burukrata kapitalismo wenno panag-gundaway a mapaspasamak iti panangipataray iti gubyrno kas negosyo, ti panagakup ti kinabaknang dagiti adda iti poder."

"Burburaen ti CNL ti naratibo nga iti dua a kampo nga agrikrikyar laeng a rumbeng a magudwa ti panagtakder, gapu ta agpada a nasken nga agsungbat da Marcos Jr ken Sara Duterte karaman ti dadduma pay," kuna met ni Ka Mingol.

Uray nagduduma ti ibagbaga dagiti lider-simbaan seknan iti korapsyon, segun ken Ka Lila, nalawag iti CNL ti nasaknap a pungtot ditoy ti masa a relihiyoso.

"Karit kadagiti lider ti simbaan nga agbalin a pagwadan ti panagpakumbaba ken dayalogo," panangitu-

loy ni Ka Mingol. Immawag met isuna kadagiti nababbaba a lider—dagiti obispo, padi, pastor, ministro ken dagiti lokal a lider—a saan nga agbalin a paspasurot laeng ti upisyal a linya, nangruna nu labsing daytoy kadagiti naadal da kanaig ti hustisya. "Isuda ket salaknib ti arban, saan a salaknib ti turay wenno kinaulimek iti sango ti kinadakes. Nasken a pandayen da ti konsensya ti kamkameng tapno makipaset da nga addaan pangngeddeng saan laeng a kas kameng ti bloke nu di ket kas bilang responsable nga indibidwal ti kagimongan."

Kas iti napalabas, nagdakkel ti papel ti Simbaan iti panagorganisa ken panangriing iti umili para iti hustisya ken panagbalbaliw ti gimong, segun ken Ka Mingol. Napateg a saan nga agsardeng a papigsaen ti intar para iti demokratiko a rebolusyon ti umili. Kunana, determinado ti CNL a marimbawan ken maipagballigi ti dadakkel a karit ti konserbatismo, panangpreserba iti bagi para iti bukod nga interes ken ti Red-tagging tapno gun-oden ti baro a regta ti panagpalawa ti intar dagiti rebolusyonaryo a kadagiti tao a relihiyoso.

Ipakpakaawat ti CNL a tapno maiwaksi ti burukrata kapitalismo, kasapulan ti rebolusyonaryo a panagtignay. Maysa daytoy a mangriing ken mangpagkaykaysa iti rikna, nangruna iti nalawa nga intar ti relihiyoso a kabataan. Kakitaan isuda ti regta iti pannakipaset kadagiti tignay-protesta agingga iti armado a dangadang iti kaawayan. Ikamkampanya ti CNL kadagiti tao't simbaan ti rebolusyonaryo a programa ti National Democratic Front: maipakpakita nga adda ti alternatibo a sistema ti panangimaton nga agserserbi iti demokratiko nga interes ti masa.



Panagkumplot ti burgesya kumprador ken burukrata kapitalista iti sistemiko a korapsyon

Kadagitoy napalabas a bulan, naiparang ti sistemiko a korapsyon ken garapalan a panagtakaw iti pondo ti umili dagiti adda iti poder. Manipud iti naanomalya a proyekto nga imprastruktura ken pork barrel, "unprogrammed appropriation" ken "allocables" iti nailyan a badyet, nagbalin a nalawag ti papel ti burukrata kapitalismo iti mapadpadasan a napalalo a panagsagaba ken kinakurapay ti umili.

Iti sidong ti agraraira a sistema, saan laeng nga ar-aramaten dagiti burukrata kapitalista ti pusisyon da tapno agakup ti kinabaknang. Agar-aramid da met kadagiti linteg ken agipatpatungpal kadagiti patakaran nga agserserbi iti pabpaboran da a dadakkel a burgesya kumprador ken gangannaet a kapitalista. Iti daytoy a proseso, mainayon da nga agak-akup ti kinabaknang.

Iti unos ti nasurok tallo a tawen ti rehimen US-Marcos, nag-amyenda ken nagipatungpal daytoy ti saan a bumaba iti 15 a linteg para iti pagnam-ayan ken benepisyo dagiti burgesya kumprador ken gangannaet a kapitalista. Kabilang ditoy dagiti linteg para iti panagkissay ti buwis dagiti korporasyon, panangipalubos kadagiti kumpanya nga agtagikwa ti 100% kadagiti napapateg nga industriya ti pagilyan kas ti telekomunikasyon, eropwerto ken *renewable energy*. Nayon ditoy ti panangipalubos iti panangikut ken panagusar kadagiti daga ti Pilipinas agingga 99 tawen. Pinapardas ken pinalaka met ti rehimen ti panagproseso iti aplikasyon dagiti gangannaet nga agpu-puonan iti pagilyan.

Kabilang da Manny Villar, Enrique Razon ken Ramon Ang kadagiti burgesya kumprador a bim-maknang nga usto iti sidong ti rehimen US-Marcos. Dagitoy met a tallo ti adda iti likod dagiti kadakkelan a partido pulitikal iti pagilyan. Iggem ni Razon ti National Unity Party, ni Villar ti Nacionalista Party ken ni Ramon Ang ti Nationalist People's Coalition. Kontrolado da ti

42% dagiti senador, 27% dagiti konggresista ken 33% dagiti gubernador.

Pribatisasyon kas paset ti sistemiko a korapsyon

Sumagmamano kadagiti pagta-udan ti kinabaknang dagiti dadakkel a burges kumprador ti pribatisasyon dagiti serbisyo, imprastruktura ken negosyo a pangpubliko. Maysa kadagiti pamuspusan tapno makaala ti proyekto ket babaen ti Unsolicited Proposal (UPS) ti Public-Private Partnership Code of the Philippines (2023). Iti sidong ti linteg, mapapapigsa ti bileg ti pribado a sektor a pilyen ken imatonan dagiti proyekto a kayat daytoy a kontrolen.

Iti sidong ti PPP, agit-ited ti gubyrerno ti "garantiya" manipud iti pondo ti umili tapno masigurado a matuloy ti proyekto. Ti gubyrerno met ti mangsippaw nu bareng malugi ti proyekto.

Ti San Miguel Corporation (SMC) ni Ramon Ang ti maysa a nakinabang nga usto iti PPP. Naala ti SMC ti mano kadagiti dadakkel a proyekto daytoy babaen ti UPS. Kabilang ditoy ti New Manila Interna-

tional Airport (NMIA), MRT 7, Cavite-Batangas Expressway ken Pangasinan Link Expressway. Gapu iti sabwatan ni Ang ken ti rehimen Marcos, nalaka a naala ti SMC ti kontrata iti panag-opereyit ken panangimaton iti kangrunaan nga eropwerto ti pagilyan ken iti higante a proyekto a Navotas Bay Reclamation Project. Kabilang iti proyekto ti panangitakder ti *business district* ken *expressway* agturong iti NMIA. Na-kaala met ti kumpanya ti sangapulo a tawen a *tax holiday* para iti konstruksyon ti NMIA.

Iti laksid ti pannakadadael ti kalikasan ken pagbiagan ti umili gapu kadagiti proyekto nga imprastruktura ti SMC, awan ti sungsungbatan daytoy kadagiti panaglabsing iti linteg ken karbengan-tao. Bayat nga agak-akup ti kinabaknang usar ti pondo ti umili, sagsagraben daytoy ti proteksyon dagiti burukrata-kapitalista, nga agnumnumar met kadagiti negosyo daytoy. Nawaya met nga maus-usar ti SMC ti pulis, militar, lehislatura ken dagiti korte tapno salakniban ti interes daytoy. Palpalataken daytoy a sabwatan ti nakaro a korapsyon iti sistema a burukrata kapitalismo.

Iti sidong ti pribatisasyon, ti gangannaet a kapitalista ken lokal a burgesya kumprador ti mangidikdiktar iti anyaman a paset ti ekonomya a mabukbukan ti pondo, nu kasano ken siasino ti pagserbian ti panagdur-as. Iti agtultuloy a panangiduron ti rehimen US-Marcos iti panangisipribado iti nabatbati a pangpubliko a serbisyo, korporasyon ken imprastruktura, ad-adda laeng a lum-lummed iti gayong-gayong ti kinarigat ti umili bayat nga ad-adda a bumakbaknang ken agbalbalin a gamrud dagiti burgesya kumprador ken burukrata kapitalista. AB



DAGITI PANAGLABSING ITI KARBENGAN-TAO				
(DISYEMBRE 1, 2024 – DISYEMBRE 1, 2025)				
239,357		665		
BILANG TI BIKTIMA		BILANG TI KASO		
40	312	34	306	21
PAMMAPATAY	PANAGDANGRAN	PANAGDUKOT	TORTYUR	PANAGPILIT
11	373	7,645	12,187	
NAPAAY A PAMMAPATAY	PANAGARESTO KEN DETENSYON	INKAPILITAN A PANAGBAKWIT KEN DISLOKASYON	PANAGPANGTA, PANAGLIPIT, PAMMUTBUTENG	

Espesyal nga Ulat:
Kagiddan ti nasaknap a korapsyon: Agtultuloy ti pasista a represyon ti Rehimen US-Marcos iti umili

<https://philippinerevolution.nu/>



Celine Manlimbasog

ti baro a tagapagsarita ti **NDF-Eastern Visayas**. Ti pannakaituding na ket paset ti pinaregta a trabaho iti propaganda ti rehiyon. Balbaliw met a naipablaak ti Larab, rebolusyonaryo a pagiwarnak iti rehiyon.



inggato ni Marcos Jr sa sweldo ti MUP (*militar and other uniformed personnel*) **tapno ad-adda pay a bussogen dagiti soldado ken pulis**, bayat a parparigaten na dagiti empleyado iti gubyrno, manursuro ken mangmangged iti ospital iti nababa a sweldo, maitantantan a benepisyo ken nalablabes a panagtrabaho.

50 tawenen
ti **Liga ng Agham para sa Bayan** inton umay a Disyembre 26.

₱24.81 MILYON
pondo nga inruar ti **SSS** a pensyon idi 2024 ket nakapanagan kadagiti natayen a kameng daytoy. ₱13.19 milyon met ti ginastos daytoy para iti 143,424 a rolyo ti *tissue paper* wenno ₱92.00/rolyo.

400,000
sibilyan ti naibakwit manipud iti nagbeddeng ti **Thailand** ken **Cambodia** gapu iti panagbettak ti gubat iti baet ti 2 a pagilyan. Kabilang kadakwada ti 118 manursuro a Pilipino.

20

dyip ken *van* nga iligal nga in-impound ti LTO ti nabawi dagiti drayber idi Disyembre 10; dagitoy a lugan ket naaramat iti protesta a Layus iti Luneta 2.0 idi Nobyembre 30.



KADUA MADVI HIDMA
kameng ti Komite Sentral ti **Communist Party of India-Maoist** ken kumander ti PLGA a kinemmeg ken ingagara a pinatay ti pasista a rehimen Modi idi Nobyembre 18. Mabigbig isuna kadagiti naballigi a taktikal nga opensiba ti PLGA.

Iti sango ti represyon ti rehimen Marcos

Makidangadang dagiti Pilipino para iti karbengan- tao

Nakikaykaysa dagiti Pilipino iti panagrambak iti maika-77 Internasyunal nga Aldaw ti Karbengan-*tao* idi Disyembre 10. Iti nadumaduma a paset ti pagilyan, rinibo ti nagmartsa tapno itandudo ti karbengan-*tao* ken babalawen ti rehimen Marcos iti awan sarday a panaglabsing daytoy iti karbengan ti umili.

Dagiti tignay ket inyuna ti Karapatan ken Bagong Alyansang Makabayan (Bayan) idia Manila ken 15 syudad ken prubinsya. Nagiyebkas ti suporta ti International Coalition for Human Rights in the Philippines.

Idia Manila, rinibo ti nakipaset iti taripnong ken programa idia Liwasang Bonifacio ken iti martsa agturong Mendiola. Malaksid kadagiti organisasyon a nakabase idia National Capital Region, nakikaykaysa iti protesta dagiti grupo manipud iti Southern Tagalog. Nagkaykaysa nga awag da ti: "Gibusan ti pasista, korap ken parigat a rehimen US-Marcos Jr!"

Idi Mayo 2025, pormal nga inpatungpal ti rehimen Marcos ti National Action Plan for Unity, Peace, and Development 2025-2028. Nagserbi daytoy a balangkas ti kakarwan a pangpulitika a represyon iti umili. Kangrunaan daytoy nga ipatpatungpal ti National Task Force-Elcac.

Iti listaan ti Karapatan, saan a bumaba iti 11 milyon Pilipino ti nagbalin a biktima ti panaglabsing iti karbengan-*tao* dagiti pwersa ti estado iti sidong ti rehimen Marcos. Kabilang kadakwada dagiti biktima ti ekstra-hudisyal a pammapatay, pwersado a panagpukaw, arbitraryo a panagaresto, pwersado wenno peke a panagpasuko, awan dirdireksyon a panagpalto-paltog ken panagbomba, pwersado a panagpanaw ken panagpangta, panagriribuk ken pammutbuteng kabilang ti *Red-tagging*.

Agtaltalinaed a nakabalud ti saan a bumaba iti 696 a balud pulitikal, nu sadinno a 163 ket naaresto iti sidong ni Marcos. Kadagiti balud

pulitikal, 136 ti babbai, 93 ti nataenganen ken 89 ti masakit. Adda met nakabalud a 12 konsultant ken istap ti National Democratic Front of the Philippines para iti negosasyon iti kapya.

Iti panagleppas ti protesta idia Mendiola, pinuoran dagiti grupo ti *effigy* da Marcos ken Sara Duterte kas ari ken reyna ti pasismo ken korapsyon. Inpakita ti *effigy* nga adda ti awit nga armalayt da Marcos ken Duterte bayat a nakatugaw da kadagiti malleta a simbolo ti korapsyon.

Kapada a protesta ken aktibidad ti naisayangkat idia Baguio City, Tabuk City idia Kalinga, Mountain Province, Laoag City idia Ilocos Norte, Tarlac, Nueva Ecija, Bulacan, Legazpi City idia Albay, Naga City idia Camarines Sur, Iloilo City, Kalibo City idia Aklan, Roxas City idia Capiz, Bacolod City, Cebu City ken Davao City.

Panangitandudo ti simbaan ken mammanday-linteg iti karbengan- tao

Manipud pay iti panawen ti dati a rehimen Duterte, kadaraan ti rekord ti estado iti panaglabsing iti karbengan-*tao* idia Mindanao. Kakarwan daytoy idi inyatnag ni Duterte ti linteg militar manipud Mayo 2017 agingga 2019.

Idi Disyembre 9-10, naisayangkat idia Davao City ti Mindanao Human Rights Summit. Dinarayan daytoy ti 242 delegado manipud iti simbaan, kasta met dagiti abogado,

salaknib ti karbengan-*tao* ken organisasyon masa ti Mindanao.

Iti maikadwa nga aldaw ti aktibidad, naiyaramid ti kabuklan nga asembliya ken panangisayangkat ti Pakighiusa sa Anawim-Mindanao (Panaw-Mindanao). Ti baro a buangay a grupo ket maysa nga organisasyon nga addaan panggep nga ikkan boses ken hustisya dagiti biktima ti panaglabsing iti karbengan-*tao* idia Mindanao.

Iti Konggreso, balbaliw a nairuswat ti Mambabatas para sa Karapatang Pantao wenno Makatao Coalition idi Disyembre 9. Panggep ti koalision nga itandudo dagiti linteg a mangsalaknib iti karbengan-*tao*. Umuna a binukel daytoy dagiti mammanday-linteg, kabilang ti Makabayan Bloc idi 2018 tapno supyaten dagiti ekstra-hudisyal a pammapatay idi ti rehimen Duterte. Madama nga idadaulan daytoy ni Rep. Leila de Lima.



Maikatlo nga anibersaryo ti ipupusay ni Ka Joma, linagip

Linagip ti pamilya, gagayyem, dagiti kakadwa, partido ken organisasyon iti nadumaduma a paset ti lubong ti maikatlo nga anibersaryo ti ipupusay ni Ka Jose Maria Sison idi Disyembre 16. Iti Pilipinas ken idia the Netherlands, nairuswat dagiti aktibidad kas pananglagip ken Ka Joma.

Idia the Netherlands, nairuar ti pelikula-dokumentaryo a *My Friend the Terrorist* idi Disyembre 13. Ti aktibidad ket inyuna ti Jose Maria Sison Legacy Foundation, Friends of the Filipino People in Struggle ken lokal nga organisasyon daytoy a Maya Solidarity.

Iti Pilipinas, insagut ti maysa a sangay ti Communist Party of the Philippines idia Rizal ti insayangkat da a panagadal ti Basaran a Kurso ti Partido idi Disyembre 16.

Idia Quezon City, pinadayawan dagiti balangay ti Artista at Manunulat ng Sambayanan ni Ka Joma iti inyuna daytoy a apagdarikmat a rali idia University of the Philippines-Diliman idi Disyembre 17. Naiyaramid daytoy iti tengnga ti Lantern Parade, ti tinawen a parada dagiti parol iti kampus a daydaywen ti rinibo nga agbuybuya.

Malaksid ditoy, naitampok met iti rali ti umadani a maika-57 anibersaryo ti Partido iti Disyembre 26 ken ti panawagan iti umili a Pilipino, nangruna kadagiti kabataan, a makipaset iti gubat ti umili ken agkameng iti New People's Army.

AB

MSP-NCR, nagisayangkat ti asembliya

NAGURNONG TI NASUROK ti 20 kameng ti balangay ti Makabayang Samahang Pangkalusugan-National Capital Region (MSP-NCR) iti maysa a sikreto a lugar idi Disyembre 6 tapno isayangkat ti pangrehiyon nga asembliya da. Dimmar-ay ditoy dagiti mangmanged iti salun-at iti ospital, dagiti nars, duktur, *medical technologist*, dentista ken dagiti estudyante iti medisina ken kina-nars.

Ti asembliya ket inrana ti MSP-NCR iti pananglagip iti maika-47 anibersaryo manipud idi mabuangay daytoy idi Disyembre 6, 1978.

Iti taripnong, pinasingkeda ti MSP-NCR ti pangngeddeng para iti demokratiko a rebolusyon ti umili iti sango ti nalabes a panagsagaba ti umili a Pilipino. Kuna daytoy, napateg nga itipon ti pigsa ti sektor iti salun-at iti dangadang ti umili para iti panangiyabante ti rebolusyon.

Nabukel met iti asembliya ti 5-punto a resolusyon para iti panangpapisga iti dangadang daytoy. Nairuar ti resolusyon iti naitaplaak nga espesyal nga isyu ti pagiwarnak nga Ang Rebolusyonaryong Lunas.

Segun iti balangay, ti taripnong ket napateg nga okasyon para iti konsolidasyon ti kamkameng ti MSP. Nangted dalan daytoy tapno makaibinglay dagiti kameng ti rebolusyonaryo a kapadasan iti panagorganisa ken panangited serbisyo ti MSP a sumungbat iti awag nga agturong iti kaaw-awayan. Nayon daytoy, napateg met nga addang ti asembliya iti panagsagana iti ad-adda pay a konsolidasyon ti MSP iti nailyan a saklaw.

Mannalon ken katutubo, mapadpadisi iti bukod da a daga

NARANGGAS TI panangrabsut dagiti ganannaet a kumpanya ken dadakkel a burges kumprador iti natural a kinabaknang ken aneutral a daga dagiti katutubo ken mannalon iti pagilyan. Usar dagiti pulis, militar ken dagiti korte, rabrangisen dagitoy ti karbengan dagiti mannalon iti daga, pawpawilanda ti panaglaban ken ar-aramaten da dagiti linteg tapno papanawen isuda iti bukod da a daga.

Idia Sityo Marikhangin, Barangay Buguk, Balabac, Palawan, pinilaan ti siyam nga agaagaw ti daga iti kaso nga "squatting" wenno ilegal a panagindeg ti 282 residente a katutubo ti sityo. Kabilang a naidarum dagiti natayen ken dagiti ubbing. Idi Disyembre 17, dimmarup iti sityo ti mangibagi iti korte kadwa da dagiti armado a pulis tapno iserbi ti TRO wenno *temporary restraining order* laban kadagiti residente.

Segun iti mandato, maiparit a lapdan ti panagserrek iti sityo dagiti agaagaw ti daga iti uneg ti 20 aldaw. Segun kadagiti residente, nalawag nga adda ti kainangan daytoy a kaso iti plano ti San Miguel Corporation (SMC) nga agawen ti aneutral a daga da. Mano a tawenen a pilpiliten ti Bricktree Properties, subsidyaryo ti SMC, a tagikwaen ti daga tapno pagtakderan ti 25,000 ekarya nga imprastraktura a pangturismo para kadagiti palalo a babaknang idia Balabac.

Idia Dupax del Norte, Nueva Vizcaya, dua a darasen nga inmandar ti korte ti panagduprak ti barikada dagiti residente laban iti Woggle Corporation. Idi Disyembre 10, balligi a nalapdan dagiti residente ken tao't simbaan ti gandat a panagduprak. Balbaliw a dimmarup dagiti pulis idi Disyembre 12 tapno dupraken ti barikada dagiti residente ti Upper Tacbao, Barangay Bitnong. Bales daytoy ti kumpanya kalpasan a nasarakan a napuoran ti *excavator* daytoy didia nga aldaw.

Iti tulong ti PNP Dupax Del Norte, binutbuteng, linipit ken binastos dagitoy dagiti nagbarikada ken dinadael da dagiti alikamen da. Dua a babae a residente ti hinarang dagiti tauhan ken pinilit da nga aguk-sob. Tinutukan met dagiti pulis dagiti residente idi irupir da ti karbengan da. Tinakaw da met dagiti selpon ken ID dagiti residente idi ginandat da nga idokumento ti panangranggas kadakwada dagiti tauhan.

Sangalubongan nga aldaw dagiti migrante a mangmangged, nalagip iti Pilipinas ken iti ballasiw-taaw

LINAGIP TI NADUMADUMA a balangay ti Migrante ti sangalubongan nga aldaw dagiti migrante a mangmangged idi Disyembre 18. Indeklara da met daytoy bilang "Zero Remittance Day laban iti korapsyon," maysa nga aldaw nga aggigiddan a saan nga agipaw-it ti kwarta dagiti migrante iti Pilipinas. Porma daytoy ti protesta dagiti migrante a mangmangged tapno irehistro ti panangkundenar da iti nasaknap a korapsyon ken panagpasungbat iti amin a karaman.

Nakipaset iti kampanya dagiti balangay ti Migrante iti Thailand, Hong Kong, Japan, Canada, France, Italy, Australia, South Korea, Germany, Middle East ken USA.

Nagisayangkat met ti protesta ti sumagmamano a balangay ti Migrante tapno kundenaren dagiti panagabuson ken diskriminasyon a mapadpadasan da kas migrante a mangmangged.

Idiay New Zealand, inyawag ti Migrante-Aotearoa ti panaggibus ti sistema ti panangigalut ti *work visa* ti migrante iti employer.

Idiay US, nagprotesta ti Tanggol Migrante Movement (TMM) iti konsulado iti Pilipinas idiay Chicago, California ken Washington tapno iyawag ti panangruk-at kadagiti Pilipino nga imigrante nga inbalud ti Immigration and Customs Enforcement (ICE). Naiyanunsyo met ti panangbuangay ti Families of Filipinos in Detention, organisasyon dagiti kapamilya, gagayyem ken dagiti dati a balud ti ICE.

Iti Pilipinas, nagprotesta idiay Mendiola dagiti kameng ti Migrante Philippines manipud kadagiti balangay daytoy iti nadumaduma a prubinsya. Karaman iti protesta ti Concerned Seafarers of the Philippines, Samahan ng mga DH sa Gitnang Silangan ken Kilusang Mayo Uno.

Brutalidad ti militar ken pulis idiay Masbate ken Occidental Mindoro

IDIAH MASBATE, natiliw ken tinortyur sakbay a pinatay ti 2nd IB ti maysa a Nalabbaga a mannakigubat ti New People's Army (NPA)-Masbate idi Disyembre 13. Ti mannakigubat ket nasugatan iti saka ken natiliw kalpasan ti maysa a labanan idiay Barangay Pitogo, Cataingan iti didiay nga aldaw. Inpasidong da isuna iti brutal a pisikal a tortyur gapu iti pannakatay ti dua a soldado ti 2nd IB iti labanan.

Kabayatanna idi Disyembre 9, inaresto dagiti pulis iti kaso a pammapatay ken akusasyon a ni Juanito Bultron ket nangato nga upisyal ti NPA. Isuna ket residente ti Barangay Teresita, Cataingan nga addaan rangkap iti panunot. Parparwaren dagiti pulis a natiliw isuna idiay Barangay Malibas, Palanas.

Idiay Occidental Mindoro, dinukot ken tinortyur ti 76th IB ni Dolores Mariano Solangon, agtawen 47 a Mangyan-Iraya a babae idiay Abra de Ilog, Occidental Mindoro idi Disyembre 2, oras ti 1:30 ti malem. Ingalut da isuna iti maysa a kayo ken inpasidong da iti interrogasyon agingga alas-4:00 ti malem.

Inpan da iti nabantay nga erya ken balbaliw a tinortyur da agingga alas-9:00 ti rabii. Pinagkali da met isuna ti bukod na a tanem ken pinangtaan da a patayen nu aglibas. Napasamak ti panagdukot ken panagtortyur ken Solangon kalpasan ti maysa nga engkwentro ti 76th IB iti NPA iti Sityo Balite, Barangay Lumangbayan idiay Abra de Ilog idi Nobyembre 26.

Innareglo ti pondo a "pork" iti badyet 2026, naipinal iti *bicam*

INNAREGLO TI PANAGBIBINGAY ti *pork barrel* iti badyet 2026 ti naiparang iti umili iti naiyaramid a *bicameral conference committee (bicam)* ti Senado ken Konggreso. Uray pay naka-livestream, saan nga inlemmeng dagiti mammanday-linteg ti panagririkyar da iti anya la dita a porma ti *pork barrel* ken mano ti mabati iti badyet. Inpinal ti *bicam* ti badyet a natatek ti *pork barrel* idi Disyembre 18.

Kampay idi ket kinissayan ti Senado ti badyet ti Department of Public Works and Highways iti ₱45 bilyon gapu iti *overpricing* ngem naisubli met laeng iti *bicam* ti nasurok kagudwa ti pondo. Iti kasta, nagtalinaed iti badyet ti kaadwan ti pondo nga "allocable" ken "non-allocable" nu sadinno a mangal-ala ti presidente, dagiti konggresista ken senador ti kikkab da.

Maysa pay a naareglo iti *bicam* ti panagnayon ti pondo para iti Medical Assistance for Indigent and Financially Incapacitated Patients, *pork barrel* dagiti konggresista iti langa ti "serbisyo a pangsalun-at." Inngato pay ti *bicam* ti alokasyon manipud iti orihinal a ₱49.2 bilyon agturong ti ₱51.64 bilyon, pondo a rumbeng koma a nainayon iti badyet dagiti pangpubliko nga ospital.

Maar-areglo met iti *bicam* ti "LGU pork" wenno Local Government Support Fund a dandani dinoble ti Senado manipud iti ₱20.2 bilyon agturong ₱38.1 bilyon. Kinissayan ti Senado ti pondo para kadagiti benepisyo ken bonus dagiti empleyado tapno padakkelen ti pondo nga ayuda nga iggem dagiti lokal na upisyal.

Dagitoy nga alokasyon ket nayon iti immunan a napagnunumuan a pondo nga iggem dagiti mammanday-linteg iti langa ti ayuda. Inngato pay ti *bicam* ti ayuda nga Assistance to Individuals in Crisis Situations manipud iti orihinal a ₱27 bilyon agturong ti ₱63 bilyon.

Napagtalinaed met ti *pork barrel* ni Marcos a ₱243.4 bilyon para iti *unprogrammed appropriation* (a nalatak a naaramat iti naanomalya a *flood control project*) ken ₱10.77 bilyon a *confidential and intelligence fund*. Sibubukel met ti ₱8-bilyon a *pork barrel* ti pasista nga ahensya nga NTF-Elcac.

Dangran ken riribuk ti imperyalista a gera, mapadpadasan dagiti mangngalap ken mannalon

Kadagiti mangngalap ken mannalon nga agindeg kadagiti base militar ken pakaang-angayan dagiti *war games* ti US, saan nga adayo a posibilidad ti imperyalista a gera. Tatta pay laeng, mapadpadasan dan ti riribuk ken dangran nga ituntunda daytoy iti pagbiagan ken komunidad da.

Kabilang daytoy iti adu a naidokumento ti 35-katao a delegasyon manipud iti US a nagrikus kadagiti komunidad asideg kadagiti base militar wenno EDCA site idi Nobyembre. Iti unos ti dua a lawas, nag-sina a rinikus da ti Cagayan Valley, Ilocos, Central Luzon, Cagayan de Oro, Marawi City ken Cebu City. Napan da met kadagiti lugar nu sadinno a masansan a maang-angay ti nasasaknap a *war games* kas ti Balikpapan.

Dinayo ti delegasyon ti Pilipinas iti tengnga ti umar-arangkada a militarismo ti rehimen Trump iti Asia. Iti napalabas a dua a tawen laeng, nagikabil ti US kadagiti *long-range missile* iti Pilipinas, naganunsyo ti panagitakder kadagiti pabrika ti bala ken *drone* ken nagilukat ti adu pay a lokasyon tapno agbalin nga imbakan, *outpost* ken sanglidan dagiti tauhan ken barko nga Amerikano. Nagisayangkat daytoy ti awan ressat a *war games*, nagiaramid kadagiti *live-fire exercises* iti kabaybayan ken dagiti simulado a kombatan nga opensiya ken depensiya.

Kadagiti komunidad a napanan ti delegasyon, ammo dagiti residente a dagiti base militar ken *war games* ket mangikabkabil kadakwada ken iti Pilipinas iti sentro ti imperyalista a gera iti baet ti US ken China. Inamin mismo dagiti upisyal ti US a dagiti EDCA site ket direkta a nakasilpo iti "depensa ti US iti Taiwan." Induron dagitoy nga upisyal nga "ilako" ti US dagiti EDCA site iti Taiwan kas "non-weaponry support service."

Pudno a dangran iti simulado a gubat

"Ti ammo mi ket gubaten," ti kadawyan a dakdakamaten dagiti residente a nakauman ti delegasyon kadagiti baryo iti Cagayan Valley. Adu kadakwada ti makigkigtot iti kellaat a panagsangpet dagiti gangannaet a tropa, dadakkel a lugan ken nariringgor nga eroplano iti lugar da tunggal adda *war games* ti US.

"Awan ti pakdaar. Awan ti nangibaga nu anya ti mapasamak, wenno nu kasano kabayag," salaysay ti nakauman ti delegasyon. Kellaat a mapaspasardeng ti pagbiagan da tapno ikkan dalan dagiti "simulasyon" ti panagraut ti tropa manipud iti kabaybayan. Dumandanon dagiti maniobra a pangkombatan ti tropa kadagiti dalan, taltalon, pagkalapan ken arubayan.

Arig na nakakulong dagiti residente kadagiti balbalay da bayat a "bumanbanesbes" ti "simulado a gubat" iti ruar dagiti ridaw da. Awan ti ayuda tapno makalasat da iti inalaw. Awan ti kumpensasyon kadagiti aldaw a saan da a makasapul. Kalpasan ti "gubat," agibatbati pay dagiti tropa ti basura a basyo ti bala ken dadduma pay nga amunision kadagiti igid-baybay a pagay-ayaman dagiti ubbing.

Peggad iti kabaybayan

Direkta nga ipegpeggad ti presensya ti US ken dagiti *war games* dagiti mangngalap a Pilipino. Daytoy Disyembre laeng, nagisayangkat ti US ti sunson a *maritime cooperative*



activity (MCA) kas panangipakita iti bileg kadagiti pagiinnagawan nga isla ken pormasyon iti South China Sea. Ti umuna (Disyembre 9-10) ket naiyaramid iti laud ti Zambales, asideg iti tradisyunal a pagkalapan ti Scarborough Shoal. Nagpatayab ditoy ti US ti nadumaduma a klase ti *jetfighter* ken nagiparada ti higante nga *aircraft carrier* a USS Rafael Peralta.

Ti aktibidad ket inbilang ti China kas probokasyon a mangpangpangato ti tensyon iti kabaybayan. Nagresulta daytoy iti panagdinnusag dagiti pwersa a Chinese ken Pilipino idi Disyembre 11-12, nu sadinno a nairaman ti mano a mangngalap a Pilipino.

Inaramat ti US ti insidente tapno ikalintegangan ti napasas a panangisayangkat ti sumaruno nga MCA (Disyembre 15-16). Inpatulod daytoy ti USS Robert Smalls, maysa a *guided-missile cruiser*, tapno pabraen ti bimbak a dinnusag ken parwaren nga isuda ket "mangisalakana" iti Pilipinas. Dagitoy a serye dagiti insidente ket paset ti nalawlaw a padron ti panagsugsog ti US, bales ti China ken pannakadangran ti pagbiagan ken pagsayaatan dagiti mangngalap a Pilipino.

Saan a maatiw ti rebolusyonaryo a tignay ti India

Awan kapada ti pasista nga atake ti Operation Kagar ti reaksyunaryo nga estado ti India laban iti masa ken rebolusyonaryo a tignay nga Indian iti napalabas a dandani dua a tawen. Iti sango daytoy, agpingpinget ti Communist Party of India (Maoist), ti People's Liberation Guerrilla Army (PLGA) ken intero a rebolusyonaryo a tignay nga Indian a paayen ti deklarado a panggep ti Kagar a gibusan ken atiwen ti panaglaban ti umili inton Marso 2026.

Manipud idi naipatungpal ti Operation Kagar idi Enero 2024, nabanwar a linabanan daytoy ti PLGA. Iti laksid ti nakadakkak a pwersa a pangdarup ken pangrebbek ti rehimen Modi, panagtaud dagiti kampo militar ken kampanya a likidasyon iti liderato ti Partido, nakaisayangkat kadagiti armado nga aksyon ti gerilya a hukbo.

Iti napalabas a tawen, dumanon iti 116 ti napatay ken 208 ti nasugatan iti pwersa ti pulis ken soldado kadagiti armado nga aksyon ti PLGA. Tinarget met daytoy dagiti napeklan nga impormer ti pulis ken militar ken dagiti kadakesan a lider ti Bharatiya Janata Party, agar-ari a partido iti India. Kangrunaan a nagaramat ti hukbo kadagiti pasabog kadagiti operasyon daytoy. Ken iti mano a gundaway, nagusar ti PLGA kadagiti katutubo nga armas kas kadagiti palab-og a pasok a tiniradan.

Nupay kasta, napudno nga ilanad ti CPI (Maoist) a nagsagaba daytoy ti nakakaro a pannakaatiw iti napalabas a tawen. Kuna daytoy, dagiti pannakaatiw ket bunga dagiti pang-uneg a pagkapuyan, pannakapaay nga ipatungpal dagiti plano ti Komite Sentral ken napapigsa nga atake ti estado.


Manipud Disyembre 2024 agingga Nobyembre tatta a tawen, dumanon iti 320 a rebolusyonaryo ti namartir nu sadinno a 117 ket babbai. Saan a bumaba iti 237 kadakwada ket kameng ti Partido. Walo ket kameng ti Komite Sentral, kabilang ti kabuklan a kalihim ti Partido a ni Kadwa Basavaraju, 15 ti kameng ti

komite ti estado, 25 ti kameng ti distrito ken 73 ti kameng ti komite iti erya. Adda ti 13 manipud iti PLGA ken 33 a kadre ken aktibista ti organisasyon ti masa.

Tapno makabawi ti pigsang, immaginaw ti CPI (Maoist) a paingeten ti panaglaban iti Operation Kagar iti intero a pagilyan. Idurduron ti Partido a tudwen ken ilinteg dagiti nagkamalian iti napalabas a 22 bulan tapno malapdan ti ad-adda pay a pannakaatiw. Rumbeng met kano a pagadalan ken amirisen ti obhetibo a kasasaad ken suhetibo a pwersa iti tunggal erya tapno balbaliw a paregtaen ti Partido, makonsolida ti PLGA ken dagiti organisasyon ti masa.

Maysa kadagiti natudo ti Partido a kamali daytoy, nangruna iti gubat ti umili ket ti panagpaakikid iti bagbagi iti panangpabassit iti erya a tigtignayan. Kuna daytoy, rumbeng nga agtignay iti nalawlaw a saklaw ti hukbo ken saan nga agtalinaed a sentralisado. Partikular nga ehemplo daytoy ti pannakapaay nga umakar ti tropa ti PLGA manipud iti rehiyon a Dandakaranya, nga episentro ti Operation Kagar, agturong ti sabali a rehiyon.

Malaksid ditoy, inlanad met ti Partido ti pagkasapulan nga ibunannag, ilaksid ken supyaten dagiti traydor iti rebolusyon. Kalatakan kadagitoy a traydor da Sonu (Mallojula Venugopal Rao), dati a ka-



meng ti Departamento iti Pulitika ti CPI (Maoist) ken Satish (Takkallapalli Vasudeva Rao) nga aktibo nga agpapausaren tatta iti rehimen Modi. Simmuko da idi Oktubre, ken nagawis da ti dadduma pay idi Nobyembre. Dumanon iti 299 indibidwal ti naguyod ti pangkat ken nagisuko da ti saan a bumaba iti 277 nga armas ti PLGA ken Partido.

"Iti daytoy a panawen, rebbenngen tayo a warwaren ti buteng ken pannakariribuk iti intar tayo, agipakita ti kinatured ken papigsaen ti kumpanyansa ti Partido tayo," segun iti CPI (Maoist). Nayon daytoy, iti kinakaro ti krisis iti pagilyan ket adadda a lumawlawag tatta ti pagkasapulan nga idaulwan ti partido ti kabuklan a naindasigan a dangadang ti masa nga Indian tapno ibagsak ti panagari dagiti imperyalista, dadakkel a kumprador ken apo't daga.

Ti panagrambak daytoy iti mai-ka-25 anibersaryo PLGA idi Disyembre 2 ket panangipakita iti determinasyon nga umabante ti rebolusyonaryo a tignay ti India. Iti Lawas ti Panagrambak manipud Disyembre 2-8, naisayangkat iti kabakiran, kapatagan ken sentro nga urban dagiti pulong ti grupo ken babassit a taripnong. Nagipaskil ken nagiwaras dagiti rebolusyonaryo kadagiti poster ken polyeto tapno iyawag ti panangpapigsa ken panagkameng iti PLGA. Naisayangkat daytoy iti nairut a panagannad ken panangiyuna iti seguridad gapu iti pinapigsa nga atake ti estado.

AB